

В НЕДЕЛЮ СЫРНЫЙ ВЕЧЕРА,

**на Господи возвах, поем яко обычно, стихиры Осмогласника 3: и Миней
настоящего святого 3. Слава, и ныне, Богородичен.**

**На стиховне же оставляется Осмогласник,
и поем самогласен дне, оба лика вкупе. Глас 8:**

Ласкосердствовавше первую подяхом наготу, / победившеся горьким
вкусом, / и от Бога изгнани быхом. / Но возведемся к покаянию, / и чувства
очистим, / к нимже брань, вход поста творяще: / надежду благодати сердца
извествующе, / не брашны, в нихже не пользовашася ходившии. / И снестся
нами Агнец Божий, / во священной и светоносной нощи Воскресения, / нас
ради приведеное заклание, / учеником приобщенное в Вечер Таинства, / и
тьму разоряющее / неведения светом Его Воскресения.

**Стих: К Тебе возведох очи мои, живущему на небеси. Се яко очи раб в
руку господий своих, яко очи рабыни в руку госпожи своея: * тако очи наши ко
Господу Богу нашему, дондеже ущедрит ны.**

Ласкосердствовавше первую подяхом наготу, / победившеся горьким
вкусом, / и от Бога изгнани быхом. / Но возведемся к покаянию, / и чувства
очистим, / к нимже брань, вход поста творяще: / надежду благодати сердца
извествующе, / не брашны, в нихже не пользовашася ходившии. / И снестся
нами Агнец Божий, / во священной и светоносной нощи Воскресения, / нас
ради приведеное заклание, / учеником приобщенное в Вечер Таинства, / и
тьму разоряющее / неведения светом Его Воскресения.

**Стих 2: Помилуй нас Господи, помилуй нас, яко по многу исполнихомся
уничижения: наипаче наполнися душа наша поношения гобзующих, * и
уничижения гордых.**

**И поем мученичен в тойже глас: Мученцы Господни, / всяко место
освящаете, / и всяк недуг врачуете: / и ныне молите, / избавитися сетей
вражиих / душам нашим, молимся.**

Слава, и ныне, Богородичен, глас тойже:

**Небесная поют Тя благодатная, / Мати Безневестная: / и мы славословим
неизследованное / Твое Рождество, Богородице, / моли спастися душам нашим.**

В ПОНЕДЕЛЬНИК СЫРНЫЙ НА УТРЕНИ,

На Бог Господь, тропарь святому, дважды.

Слава, и ныне, Богородичен по гласу.

**По 1-м стихословии седален Осмогласника. И чтем слово Великаго
Василиа [о еже, Внимай себе.]**

По 2-м стихословии поем Триоди, глас 1.

Подобен: Камени запечатану:

**Отверзошася божественнаго покаяния преддверия: / приступим усердно, /
очистивше телеса, / брашен и страстей отложения творяще, / яко послушницы
Христа, / призвавшаго мир в Царствие Небесное, / десятины всего лета
приносяще всех Царю, / яко да и Воскресение Его / любовию узрим.**

Слава, тойже паки.

И ныне Богородичен:

**Руце Твои божественнии, / имиже Содетеля носила еси Дево Пресвятая, /
воплощенна Божеством, / простерши умоли, избавитися нам от искушений, / и
страстей и бед, / восхваляющим Тя любовию, / и вопиющим Тебе: / слава
всельшемуся в Тя, / слава прошедшему из Тебе, / слава свободившему нас
Рождеством Твоим.**

**Каноны же поем якоже обычай во Октоихе: и в Минеи святому. В коих же
песнях приходит трипеснец, аще ли есть двоирмосен, оставляем оба канона
Октоиха: и поем в Минеи канон со ирмосом на 6: и в Триоди на 8. Канон
Минеи, и настоящий трипеснец.**

Творение господина Иосифа, глас 1.

Песнь 1.

Ирмос: Песнь победную поим вси Богу:

**Светлая предпразднства воздержания, светлая предпутия поста днесь.
Темже стецемся в надежде братие, и усердии мнозем.**

**Адаму праотцу преступлением поревновав, изгнан бых от сладости
окаянный. Темже припадаю Ти в покаянии и плачи: Господи, спаси мя.**

**Начало умиления и покаяния, злых отчуждение, и страстей воздержание.
Темже потщимся отсечение лукавых дел сотворити.**

**Богородичен: Нощию прегрешений омрачен, к Тебе рождшей сущим во
тьме Солнце правды Христа, ныне прибегаю прилежно, Владычице спаси мя.**

Иный трипеснец. Ирмос тойже.

**Се предотверзеса покаяния дверь боголюбцы: приидите убо, потщимся
внити тою, прежде даже не заключит сию Христос, яко недостойным нам.**

Весну возвещающая приближися сия, ныне предочистительная седмица всечестная, священных постов, телеса и души всех просвещающая.

Слава, Троицен: Неслитная, несозданная, Троице Святая, Единице преблагая, Отче, и Сыне, и Душе сродный, покланяющиеся Тебе верно, присно спасай.

Богородичен: Победишася, Всечестная, в Тебе пределы Дево естества: пребываеши бо рождши без мужа Бога, якоже прежде рождества Чистая, паки невреждена.

Таже ирмос: Песнь победную поим вси Богу, / сотворшему дивная чудеса мышцею высокою, / и спасшему Израиля, / яко прославися.

По 3-й песни седален: Слава, и ныне, Богородичен.

По 6-й песни кондак, и икос святого.

Песнь 8.

Ирмос: Егоже ужасаются ангели:

Житие мое все блудно иждив, гражданином работах горьким и лукавым: но желающа мя к Твоим щедротам ныне обратитися Христе, не презри.

Образ жития моего срамный, и лютый: милость безмерная, Человеколюбче Спасе, Твоего благоутробия, покаяния время даждь ми просящу, и любовь Тя поющу.

Каинову поревновах окаянному житию, ума достояние умертвив истинно, и трепещу суда Твоего Благодетелю: не осуди мене с сим во веки.

Богородичен: Дево всепетая, едина к Богу верных сущи помощь твердая, тьмы мя избави, и мучения належащаго лукавно живущим.

Иный.

Ирмос: Песнь Тебе приносим безплотных, / якоже отроцы в печи, / и поюще глаголем: / благословите вся дела Господня Господа.

Сие время есть покаяния, темже благомудренно начнем братие, вопиюще: благословите дела Господня Господа.

Днесь брашен отрешися, потщимся делом и прегрешений достойно каятися: благословите дела Господня Господа.

Благословим Отца, и Сына, и Святаго Духа, Господа.

Троицен: Слава Тебе невидимая Троице Святая, во Единице покланяемая, Юже верно славим: спасай рабы Твоя от всякаго вреда.

Богородичен: Радуйся всеблаженная Чистая Дево: радуйся Господня Рабо, и Мати: радуйся покрове мира Богородице благословенная, Марие всесветлая.

Хвалим, благословим, покланяемся Господеви:

Ирмос: Песнь Тебе приносим безплотных, / якоже отроцы в пещи, / и поюще глаголем: / благословите вся дела Господня Господа.

Песнь 9.

Ирмос: Светоносный облак:

Мирным постоянием, чистою любовию священнейшее время святаго поста восприимем вернии, просяще оставления, ихже кийждо согреши: яко да тамошнюю улучим радость.

Се время покаяния, предпразднственный сей постов вход: востани душе моя, Благодетелю и Богу тепле примириися, яко да суда избегнеши онаго праведнаго и страшнаго воистинну.

Постов входы и преддверия, вси да не оскверним зле невоздержанием и пьянством: но в чистоте помышлений усердно внидем, приемше нетления венцы и трудов достойне плоды.

Богородичен: **О** нас молящи Благаго не престай, немощь нашу ведущаго единаго: глада же, и пагубы, и труса, и всякаго озлобления избавитися чтущему Тя граду, Богородице, упование земнородных.

Иный.

Ирмос: Тебе виденую дверь / Иезекиилем пророком, / Еюже никтоже пройде, / токмо Бог един, / Богородице Дево, песньми почитаем.

Введесе время душе моя покаяния, не небрези: алчущим даждь хлеб, молися Господеви на всякий день, и ночь, и час, да спасет тя.

Мяс, и прочих брашен якоже удаление сотворихом, тако и всякия вражды к ближним вкупе, блуда же и лжи, и всякия злобы убежим.

Слава, Троицен: Единому поклоняюся Естеством безначальному Божеству, трети же Лицами славлю в Троице Единицу нераздельную, и сопрестольную.

Богородичен: Ты еси верных Дево похвала, упование и предстательство: Тя песньми пений славим непрестанно Богородице Марие, спаси рабы Твоя.

Ирмос: Тебе виденую дверь / Иезекиилем пророком, / Еюже никтоже пройде, / токмо Бог един, / Богородице Дево, песньми почитаем.

Светилен Октоиха: Слава: святому, аще есть. Аще ли ни: Слава, и ныне, Богородичен.

На стиховне стихира самогласна, Глас 3:

На всякое время пост полезен есть, / изволяющим и творящим / и: ниже бо искушение демонское дерзает / на постящагося: / но и хранители жизни нашея ангели, / люботруднейше с нами пребывают, / постом очистившимися.

Стих: Исполнихомся заутра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

На всякое время пост полезен есть, / изволяющим и творящим / и: ниже бо искушение демонское дерзает / на постящагося: / но и хранители жизни нашея ангели, / люботруднейше с нами пребывают, / постом очистившимися.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.

Мученичен: Святых страстотерпцев память, / приидите людие вси почтим: / зане позор бывше ангелом и человеком, / победныя венцы от Христа прияша, / и молятся о душах наших.

Слава, и ныне, Богородичен, тойже глас:

Без семене зачала еси от Духа Святаго, / и славословяще воспеваем Тя: / радуйся Всесвятая Дево.

Ведомо же буди, яко в понедельник сырныя недели ядим дважды днем.